



29.04.03

03/00242-542.1

27.12.2002

2002/12780/H/or-2

Fiskeridirektoratet - Region Hordaland
Postboks 233
5804 Bergen

**UTSLEPPSLØYVE FOR FJORDFARM A/S (H/OR 002) OG
FYLLINGSNES FISK AS (H/L 003) PÅ LOKALITETEN
EIKEBÆRÅNÆ I LINDÅS KOMMUNE**

I medhald av § 11, jf. § 16, i *Lov om vern mot forurensninger og om avfall av 13. mars 1981 nr. 6* (forureiningslova), gjev Fylkesmannen i Hordaland med dette **Fjordfarm AS (H/or 002) og Fyllingsnes Fisk AS (H/l 003)** løyve til utslepp til luft og vatn frå eit matfiskanlegg for laks og aure på følgjande lokalitet:

Lokalitet	Kommune	kartblad	UTM - koordinatar	Ramme
Eikebærånæ	Lindås	1116-II	LN 000 197	24 000 m ³

Løyvet gjeld på dei spesielle og generelle vilkår som følgjer vedlagt. Løyvet er ikkje gyldig før fiskerisjefen har gjeve konsesjon etter oppdrettslova. Løyvet erstattar tidlegare utsleppsløyve på denne lokaliteten datert 14.08.97.

Ramme for utsleppsløyvet

Dette løyvet gjeld for eit matfiskanlegg for laks og aure på lokaliteten Eikebærånæ i Lindås kommune. Løyvet omfattar samlokalisering for konsesjonane H/or 002 (Fjordfarm AS) og H/l 003 (Fyllingsnes Fisk AS), og ein produksjonsauke frå 12 000 m³ til 24 000 m³. Kvar for seg har konsesjonane berre løyve til 12 000 m³.

Dersom konsesjonen ikkje har etablert seg, utvida eller flytta innan 2 år, må det etter § 20 i forureiningslova gjevast melding til fylkesmannen, som avgjer om det må sendast inn ny søknad.

Løyvet gjeld også for utslepp frå reingjering av nøter (notvaskar) og anna produksjonsutstyr, førtillaging og medisiner. Det er også sett vilkår for handtering av daudfisk-avfall og anna avfall knytt til vanlege aktivitetar ved anlegget.

Løyvet gjeld ikkje for slakting/sløyning/foredling av fisk.

Bakgrunn

Vi viser til søknad dagsett 18.06.2002, oversendt frå regiondirektøren i skriv datert 27.12.2002.

Verksemda søkjer om løyve til samlokalisering/samdrift mellom konsesjonane H/or 002 (Fjordfarm As) og H/l 003 (Fyllingsnes Fisk AS) på lokaliteten Eikebærånæ i Lindås kommune. Søknaden omfattar også ein produksjonsauke frå 12 000 m³ til 24 000 m³.

Fylkesmannen si vurdering/grunngeving

Fylkesmannen skal vurdere dei verknadene etableringa får for dei ulike ansvarsområda. I rundskriv T-3/86 (jf. rundskriv T-3/93) har Miljøverndepartementet delegert mynde til fylkesmannen til å avgjere oppdrettssøknader etter forureiningslova § 11. Fylkesmannen skal også gje fråsegn i oppdrettssøknader med omsyn til *vilt, laksefisk/innlandsfisk, naturvern og friluftsliv*. Rundskrivet gjev retningsliner for kva tilhøve som bør trekkjast inn i vurderinga av søknaden.

I følge oppdrettslova § 5 skal det ikkje gjevast konsesjon dersom omsøkte anlegg vil få ei klar uheldig plassering i høve til omkringliggjande miljø, lovleg ferdsle eller annan utnytting av området.

- Tilhøvet til plan

Lindås kommune handsama søknaden i møte i Næring- og Miljøkomiteen 01.11.02 og tilrådde som omsøkt. I kystsoneplanen til kommunen ligg lokaliteten i eit område avsett til akvakultur, fylkesmannen har difor ingen merknadar i høve til plan.

- Vilt, laksefisk/innlandsfisk, naturvern og friluftsliv

Fylkesmannen kan ikkje sjå at ei utviding av lokaliteten vil koma i konflikt med prioriterte naturvern- eller friluftsinnteresser. Når det gjeld omsynet til ville stammar av anadrom laksefisk tilrår fylkesmannen at det vert lagt vekt på rømingssikringstiltak ved anlegget og likeins tiltak for å hindre spreiding av lakselus. Vedkomande viltinteresser vert det vist til uttale og vilkår gjeve i vedlegg 2.

- Forureining

Rapport etter gjennomført resipientgransking i 1992 utført av institutt for fiskeri og marinbiologi ved UiB, viste at Osterfjorden har gode miljøtilhøve, og vart vurdert å ha høg resipientkapasitet. Førehandsvurdering av lokaliteten utført av Rådgivende Biologer AS i 2002, konkluderer med det same. Her viser også kartmateriale med innteikna djupnekoter at det er gode djupne under anlegget, (mellom 100 – 200 m) og frå anlegget vert det større djupne jo lenger ein kjem ut. Anlegget ligg over over skrånande botn utan

tersklar i lengderetninga. Det er såleis å venta at det vil vere gode oksygentilhøve og god utskifting av vatnet, og at det difor kan vere tilrådeleg å gje løyve om ei utviding av produksjonen til omsøkte 24 000 m³.

Eit volum på 24 000 m³ gjev likevel eit potensiale for høg organisk belastning, fylkesmannen kan difor setja krav om resipientgransking etter ei tids drift dersom ein finn grunnlag for dette. Vi viser til punkt 7 i vilkår for utsleppsløyvet.

Vilkår for utsleppsløyve er gjeve i vedlegg 1.

Erstatningsansvar


Utsleppsløyvet fritenk ikkje for erstatningsansvar for forureiningsskade etter forureiningslova, jf. § 10 og kap 8.


Klagerett m.m.

Vedtaket kan påklagast til *Statens forurensningstilsyn* (SFT) etter reglane i kap. VI i forvaltningslova av partane i saka eller andre med rettsleg klageinteresse. Klage skal sendast til fylkesmannen innan 3 veker frå vedtaket har teke til å gjelde, dvs. frå det tidspunktet anlegget har fått konsesjon etter oppdretslova. Klagen skal vise til det vedtaket som klagen gjeld og den eller dei endringar som klagaren ønskjer. Klagen bør grunngjevast, og eventuelle opplysningar som kan ha innverknad på saka bør nemnast.

Dersom vedtaket blir påklaga, kan fylkesmannen eller SFT etter førespurnad vedta at vedtaket ikkje skal tre i kraft før klagen er endeleg avgjort, jf. § 42 i forvaltningslova.

Partane i saka har rett til å sjå saksdokument etter forvaltningslova §§ 18 og 19. Fylkesmannen vil på førespurnad kunne gi nærmare opplysningar om sakshandsaminga.


Håkon Kryvi e.f.
seksjonsleiar


Signy Myksvoll
avd. ingeniør

Vedlegg: Utsleppsløyve (vedlegg 1)
 Vilt (vedlegg 2)

Gjenpart m/vedlegg:

Fjordfarm AS, 5337 Rong

Fyllingsnes Fisk AS, 5913 Eikangervåg

Lindås kommune 5914 Isdalstø

Hordaland fylkeskommune, Avd. for regional utvikling, 5020 BERGEN

Statens dyrehelsetilsyn, Fylkesveterinæren for Hordaland, Sogn og Fjordane, Bontelabo
8A, 5003 BERGEN

VEDLEGG 1

Vedlegg til utsleppsløyve

av 29.04.03

for Fjordfarm AS (H/or 002)

og Fyllingsnes Fisk AS (H/1 003)

VILKÅR FOR LØYVET

1. UTSLEPP TIL VATN

1.1 Fôr

Ved fôring av fisken skal tap og spill av fôr reduserast mest mogeleg.

Det er berre tillate bruk av tørrfôr eller mjukpellets.

DEFINISJONAR:

Mjukfôr/pellets: Oppmalen fisk/fiskeavfall, tilsett så mykje bindemiddel at det kan fôrast ut som pellets utan å gå i oppløysing.

Tørrstoffinnhald > 50 %

Tørrfôr: Tørrstoffinnhald > 90 %

1.2 Medisin/kjemikaliar

Bruk og utslepp av medisin, insekticid, desinfeksjonsmiddel m.m. skal skje i samsvar med gjeldande regelverk/retningsliner frå forureiningsstyresmaktene.

1.3 Sanitæravløpsvatn

Utslepp av sanitæravløpsvatn frå personalrom m.m. må godkjennast av kommunen i samsvar med gjeldande reglar for utslepp.

2. UTSLEPP TIL LUFT

Fôrlagring og fôrtillaging, spyling, reingjering og tørking av nøter, handtering av avfall, samt andre aktivitetar ved anlegget skal gå føre på en slik måte at dei ikkje fører til særlege luktulempar for naboar m.m.

3. STØY

Oppdrettsanlegget skal utformast og drivast slik at støynivået ikkje overstig SFT sine grenseverdiar for ekstern industristøy, jf. *Retningslinjer for begrensning av støy fra industri m.v.* (TA-506, 1985).

4. AVFALL OG SLAM

4.1 Produksjonsavfall og slam

Daud fisk, slakteavfall, fôrrestar, slam, feitt o.l. skal handterast slik at det ikkje oppstår forureiningsmessige ulemper.

Oppdrettsanlegget skal disponere eigen daudfiskkvern/ensileringsutstyr og mellomlager for lokal handsaming og konservering av fiskeavfall. Ensilert fiskeavfall skal mellomlagrast lokalt, og oppdrettsverksemda skal ha tilgang til lagertank. Volum på lagertank skal avpassast etter produksjonsmengde og transportavstandar, og bør vere 5 % av årleg produksjonsmengde.

Daud fisk skal takast opp av sjøen minst ein gong kvar dag i sommarhalvåret og minst ein gong annankvar dag i vinterhalvåret. Når det dør meir fisk i anlegget enn vanleg, skal frekvensen aukast tilsvarande.

Oppsamla daud fisk skal konserverast straks ved ensilering, frysing e.l. og førast til eige lager. Ved ensilering skal fisken kvernast.

Ensilert fiskeavfall skal leverast til godkjent attvinningsanlegg for fiskeavfall.

Dumping av daud fisk og anna avfall i sjøen er ikkje tillate.

Nedgraving og forbrenning er ikkje tillate utan skriftleg løyve. Søknad om forbrenning skal rettast til *Statens forurensningstilsyn*, medan søknad om nedgraving skal rettast til fylkesmannen og fylkesveterinæren.

Oppdrettsanlegget skal ha planar (beredskapsplan) og utstyr for å ta hand om massiv fiskedaude, t.d. ved algeoppblomstring eller sjukdom. Beredskapsplanen skal m.a. omfatte strategiar til raskt å kunne handtere massedaude av fisk i anlegget, og klargjere kven som har ansvar for kva i slike situasjonar

4.2 Medisin- og kjemikalierestar.

Unytta restar av medisinfor, antibiotika, insekticid samt andre spesielt miljøfarlege stoff inkludert emballasje skal samlast og lagrast forsvarleg før dei vert henta av produsent eller annan instans som er godkjend av styresmaktene. Det same gjeld for oppsamla fôrrestar og ekskrement som inneheld antibiotika.

4.3 Anna avfall

Emballasje o.l. samt alt anna avfall som ikkje er omfatta av pkt 4.1 og 4.2 skal førast til godkjent avfallsanlegg for slike avfallstypar.

4.4 Slamfjerning

Dersom det må fjernast slam frå sjøbotnen, må det søkjast om eige løyve. Skriftleg søknad som gjer greie for korleis slammet er tenkt transportert og disponert skal sendast til fylkesmannen. P.g.a. smittefaren må også veterinærstyresmaktene varslast.

Oppsamla slam skal om mogeleg nyttast til gjødsel/jordforbetningsmiddel.

5. LAGRING AV MEDISIN OG KJEMIKALIAR

Medisin, insekticid, kjemikaliar m.m. skal lagrast forsvarleg og avlåst slik at dei ikkje er tilgjengelege for uvedkomande.

Lagerlokalet skal utformast slik at spill ved uhell e.l. ikkje blir slept ut, men kan samlast opp. Dette kan t.d. sikrast ved hjelp av oppsamlingstankar eller ved å laga kantar som gjer eit stort nok volum.

6. KONTROLL

6.1. Rutiner for vedlikehald.

Verksemda pliktar å føre jamleg tilsyn og kontroll med føringsutstyr, eventuelle reinseanlegg m.m., slik at desse alltid vert drivne mest mogeleg effektivt. For å sikre dette, skal verksemda driva rutinemessig førebyggjande vedlikehald og ha eit rimeleg reservelager av dei mest utsette komponentane.

6.2 Kontroll

Verksemda skal registrere og journalføre følgjande data;

- * fiskemengde
- * mengde daud fisk
- * mengde rømd fisk
- * fôrtype og fôrforbruk
- * bruk av:
 - antibiotika, type og mengde
 - insekticid " "
 - andre kjemikaliar
- * mengde oppsamla slam med antibiotika, og disponeringsmåte

*** avfallsmengder og disponeringsmetode**

Journalen må takast vare på ved anlegget i minst 2 år og vere tilgjengeleg ved kontroll-/inspeksjon.

Verksemda pliktar å la representantar for fylkesmannen og dei etatar og institusjonar som har fullmakt frå fylkesmannen inspisere anlegget når dei måtte ønskje det.

7. RESIPIENTGRANSKINGAR

Verksemda pliktar å kosta eller delta i dei granskingar som fylkesmannen finn turvande for å kartleggje forureiningseffekten til anlegget, jf. § 51 i forureiningslova . Verksemda kan også påleggjast å betale ein høvesvis del av kostnadene ved eit resipientgranskingsprogram for området der anlegget er plassert.

8. GENERELT

8.1 Eigenkontroll og ansvar

Verksemda pliktar, gjennom instruksar, kontroll og andre tiltak, å syte for at drifta av anlegget skjer slik at ulemper og skadeverknader vert mest mogeleg avgrensa.

8.2 Akutte utslepp

Verksemda pliktar å gjennomføre tiltak med sikte på å unngå akutte utslepp av t.d. antibiotika, kjemikaliar o.l. Dersom det oppstår akutte utslepp skal fylkesmannen varslast så snart som mogeleg.

8.3 Forureiningsgebyr og straffeansvar

Forureiningsstyresmaktene kan etter § 73 i forureiningslova gjere vedtak om forureiningsgebyr for å sikre at reglane i lova og vilkåra i dette løyvet vert etterlevde.

Brot på vilkåra i løyvet er straffbart etter kap. 10 i forureiningslova.

8.4 Endring av utsleppsløyvet

Dersom fylkesmannen finn det naudsynt, kan det setjast krav om at ytterlegare tiltak vert gjennomførte for å hindre eller redusere forureiningsfaren frå oppdrettsanlegget. Eventuelt kan han krevja at anlegget vert flytta når krava i § 18 i forureiningslova "*om endring og omgjøring av tillatelse*" er oppfylte.

8.5 Nedlegging, eigarskifte, konkurs

Ved eigarskifte, inkludert eigarskifte i samband med konkurs, må det gjevast melding om dette til forureiningsstyresmaktene innan 4 veker. Det same gjeld ved endring av namn.

Ved nedlegging av drifta, t.d. på grunn av konkurs, skal det også gjevast melding til forureiningsstyresmaktene, jf. § 20 i forureiningslova.

Verksemda er ansvarleg for rydding og istandsetjing av det området som har vore i bruk, jf. § 20 i forureiningslova.

VEDLEGG 2

VILT

Viltlova frå 1981 skal sikre alle dyr og fuglar eit minimum av vern. I utgangspunktet er alle viltartar freda. Lova seier vidare at:

"Ved enhver virksomhet skal det tas hensyn til viltet og dets egg, reir og bo, slik at det ikke påføres unødig lidelse og skade."

Ut frå noverande kjennskap til området, synast ikkje den påtenkte plasseringa å kome innafor viktige viltbiotopar. Indirekte kan ei slik etablering føre til konflikhtar og påførast problem med omsyn til det frittlevande viltet. Røynsle har vist at desse anlegga kan verke tillokkande for villmink, oter og visse fugleartar frå dei kringliggjande områda. Skadeproblema som dermed oppstår, kan i neste omgang aktualisere søknad om fellingsløyve.

Før ein søknad om fellingsløyve kan etterkomast, gjeld det visse generelle vilkår som må vere oppfylte.

Det vert presisert at før felling pliktar eigar, brukar eller rettshavar i rimeleg omfang å prøve andre tiltak for å førebyggje viltskade.

Når det gjeld dette anlegget, bør det av omsyn til viltinteressene, og som førebyggjande tiltak mot viltskade, fastsetjast følgjande vilkår for konsesjon:

1. Eigar av oppdrettsanlegget skal montere måsenett over kar og merdar som står utanomhus før dei vert tekne i bruk. Det må sytast for at nettet til ei kvar tid er i tilfredsstillande stand.
2. Ved eventuell viltskade på oppdrettsanlegget skal eigaren straks ta kontakt med viltnemnd eller viltkonsulent for å drøfta aktuelle åtgjerder.
3. Eigaren av oppdrettsanlegget skal førebu montering av flytelense med sperregarn og otersikker port på landgangen. Montering av slik lense og port skal gjennomførast når fylkesmannen eller miljøvernstyresmaktene sentralt krev det. Maskevidda på sperregarna skal avgjerast av miljøvernstyresmaktene.

